

烈引義遂動鬼神歷詆用事者不少選蠕雖流竄僂辱氣
未嘗折下也方舉朝難其異議不敢為諛赫々若此可不
謂骨鯁臣消患未萌哉雖汲黯寢逆者謀未或過矣
馮時可曰抑予嘗有言臣于君猶子于父也大忠無所拂
詞不得已而傷其志暴其短于大戾而欲以脩和衆庶即
寔其言非幸矣陸先生在垣忠憤鬱塞先幾後指屢進讜
言至通神明而泣魑魅非大忠能然乎下遷投効力自潔
雪君名毋傲部名毋汚寒蟬威鳳始終無所蹉跌推公意
念固非引罪廣忠如子事父沒身而不解盛德之至哉

十一月庚寅朔署都督僉事成勛孫勇高秉元种繼為左營副
將署都指揮僉事陶希臯許策王玉葉繼文趙承懋蕭鎮趙
應魏民黃恩欒繁劉秉中趙卿吳尚賢伯安張世武田震王
三錫茂鎮劉芳施寬孫承宗署都督僉事劉昂雲前延綏提
兵王輔薊州提兵周徹涼州副提兵蕭漢並為叅將
辛卯免順義懷柔平谷諸縣租役蓋被虜慘甚也

壬辰巡撫山東孫世祐改總理糧儲巡撫應天


遼陽副提兵李涑為署都督僉事總兵鎮守山西

癸巳御史魏謙吉往甘肅劉廷儀往寧夏蕭端蒙往延綏姜

國權

嘉靖二十九年

二十



廷願往宣大選兵入衛仇鸞以京兵弱不任戰故徵邊兵兵部左侍郎王邦瑞謂輕外事內非策不聽鸞日重擅部置朝奏夕可不覆邦瑞謂非制不聽

丁酉選遼兵三千固原兵二千保定兵六千宣府副總兵劉大章前延綏總兵吳瑛宣府叅將劉環游擊曹鎮領之
戊戌提督薊州軍務兵部右侍郎孫繪改通政使起何棟右副都御史提督薊州軍務
增通州守將

己亥南京太常寺卿趙汝濂為南京右副都御史工部右侍

郎傅鳳翔改戶部右侍郎

兵部左侍郎王邦瑞為兵部尚書以翁萬家頗南未至

免浙江金華衢台溫災租


先是沅江土舍那鑑殺土知府那憲懼討密約安南武文淵謀亂命購捕之

壬寅祧 仁昭宗皇帝甲辰 孝烈皇后祔太廟第九室

設遷曰 孝烈祔廟置 元配孝潔于何地明主可與忠

言禮臣默 微詞隱約非所以揭大誼盡胸臆也

乙丑巡撫大同趙錦為兵部右侍郎兼右僉都御史協理京



營戎政

益府金谿王厚煌薨謚莊惠

丙午分三營兵為二班輪五日聽練從仇鸞之議

前巡撫河南右僉都御史陸瑯卒字彥卿浙江嘉善人嘉靖

丙戌進士授南刑部主事歷郎中改刑部尋改南兵部出守

常德徙武昌又徙岳州救飢課最擢太僕少卿秩滿進鴻臚

光祿卿遷撫河南疾去三月卒年五十五

戊申分各邊兵應援信地

己酉上念孝烈皇后祈福內殿三日

皇貴妃王氏薨謚端和恭順溫僖

庚戌廣開事例募富民出粟助邊御史楊選議

辛亥薊州督糧右僉都御史李遂劾籍遂遲至未謝恩遽請

符印忤旨


以左副都御史吳尚德為工部右侍郎免重慶旱災田租

以福建左布政司王積為右副都御史巡撫山東

乙卯右僉都御史王忬督理薊州糧餉兼守通州

戊午阜城門外設民兵教場

己未翁萬達入朝奪兵部尚書改用



核南京各衛隱田

十二月庚申朔定兩淮餘監同開邊召商報中

壬戌仇鸞言虜銳卒有限惟聚乃強吾欲得志于虜宜有以分之請宣大遼東甘肅寧夏延綏敢戰為功報可

右僉都御史商大節為左副都御史佐院仍經略京城內外
癸亥 上祈雨內殿

丁丑巡撫山西應檀為兵部右侍郎總督漕運兼巡撫鳳陽
前大理寺卿虞守愚起南京尋進南京刑部右侍郎

己卯巡按山西御史陳九德薦謫成侍郎張漢閑住叅議潘

高有邊才以違例市恩削籍

庚辰虜俺答復款宣府不許命防備

壬午戶部右侍郎傅鳳翔兼右僉都御史督理宣大糧餉

癸未封載瑜徽王英煥楚王壽枋慶世子敬鎔隆德王載堉


德慶王在鑾儀封王勤燦浦江王恪熙內邱王載堉壽張王


充爝棗強王充燠樂昌王厚熾德興王

起許論右副都御史提督鴈門等關巡撫山西山東布政司

右布政使楊宜為南京右僉都御史提督操江

黃元白邱預達曹和為給事中張雲路周如斗蔡朴黃國用





黃季瑞為試御史

甲申南京刑部右侍郎張時徹改兵部右侍郎順天府尹郭

璿為大理寺卿

刑部尚書顧應祥上詳定開問刑條例刊之

命兵部右侍郎張時徹梁尚德右副都御史商大節錦衣衛

右都督陸炳築正陽崇文宣武門外城

國權

嘉靖三十年辛亥

正月己丑朔 上不朝

徵南京工部十五萬金治兵械戰車

辛卯大風霾晝晦連江雨石有聲如雷

以河南左布政司馬坤為順天府尹

東寧伯焦棟總兵鎮守湖廣

己亥復徵南贛鹽稅

國權

嘉靖三十年

一

庚子戶部主事于錦兵部主事趙時春為按察僉事同薊州副使齊宗道分練民兵仇鸞請申明賞罰科道官從軍驗功陞降自立功夫事日為始從之

錦衣衛經歷沈鍊劾嚴嵩十罪納賄將開邊衅一也受諸王餽遺二也攬吏部之權奸贓狼籍三也索撫按常例奔走盈門四也箝制科道官也妬賢嫉能中傷善類六也縱子斂怨七也日運財貨騷動路八也內閣九載無一善狀九也不能協謀天討紓憂君父十也吏部尚書夏邦謨大事面咨嵩

而後行小事書通世蕃而發始因賄得官繼因官納賄廉耻不立盜賊多起今日考察若不先除此二人雖日退貪墨之吏無庸矣有旨鍊作縣壞事被調揣考察不免出位肆陷大臣下錦衣衛拷訊安置隆慶鍊故善尚寶司丞張遜業得飲嚴氏嘗倡言附編脩趙貞吉侵嵩惡之語世蕃勿與鍊通鍊密聞之倉卒上書數其罪無左據嵩借考察斥之狡矣仇鸞請抽京營餘丁定伍不許命勾補正軍


甲辰望夜月食

丁未增派各省軍餉

國權

嘉靖三十年

二



仇鸞言簡銳千人為先鋒乞增游擊將軍三人領之兵部不可而止

給西番洮州諸族勘合

戊申前巡撫遼東於教廣西布政使左叅政周琬趙命愆期各降三級

庚戌免宣府大同旱災田租命總督何棟等脩築閘隘

壬子遼府沅陵王寵涑薨

乙卯禮部右侍郎陳文德為左侍郎祭酒孫陞為右侍郎刑部右侍郎彭黷為兵部左侍郎兼右僉都御史巡撫應天兵

部主事趙時春為山東按察僉事統練民兵


丁巳皇貴妃王氏薨祔闈貴妃墓哀冲莊敬二太子附之幼子隨母俱近天壽山

二月己未朔禮部尚書徐階請立太子不允

辛酉南京兵部右侍郎何釐為刑部右侍郎侍讀學士閔如霖為太常寺卿署祭酒

甲子罷耕籍禮

丁卯兵部尚書王邦瑞言安攘大計承平日久一旦軍費百出怨咨易起亟下明詔罷不急之工省得止之費令撫按諸



臣表率各屬盡心民事去年虜變失在偵伺之不明整飭之未預與調集之不早也今戰守之事俱宜預戒以脩不虞營制初定大小將佐分部訓練期于可用仍行科道時閱薊州脩邊本禦虜第一義頃回甲可乙否遂致棄而不舉若謂調集邊兵誘入拒戰此固奇矣但猶虜窺伺無時邊兵豈可常調此非計之得也宜亟脩築斷然行之上以虛文塞責對狀引罪落職尋冠帶視事

癸酉吏部內計降斥有差誥勅房大理司副徐應豐以族弟學詩故坐不謹應豐詣迎和門辭上詰中書官不預政何

斥為特旨留用當愈忌應豐後數年以悞寫科書譖狀殺之

甲戌諭總督侍郎何棟等撫朵顏等三衛夷令禦虜報効

乙亥工部尚書胡松致仕冠帶兵部尚書王邦瑞削籍

庚辰停南關土城俟來秋築

辛巳協理戎政兵部右侍郎兼右僉都御史趙錦為兵部尚


書

丙戌京察拾遺吏部尚書夏汝謨南京刑部尚書傅炯兵部

右侍郎史道南刑工部右侍虞守愚嚴時泰南京太僕寺

郎

卿謝蘭右副都御史張素于湛祭酒周文燭並免戶部左侍




郎駱顯工部右侍郎龔輝改南京右僉都御史張濂右副都
御史趙汝濂汪宗元尚寶少卿邊銑並調外
丁亥經略紫荆關翁萬達自陳罷之疏謝字誤復削籍
三月辛卯吏部右侍郎李默為吏部尚書南京右都御史歐陽
必進為工部尚書

壬辰虜俺答去冬款宣府求貢屢請益堅至是遣數騎詣寧
虜堡攢刀誓求貢市贈譯者馬二留四夷為質已縛叛卒朱
錦李寔示意提督蘇祐等以聞下廷議兵部尚書趙錦同仇
鸞等議暫許之遣文武臣會鎮巡官諭虜果不犯塞于五堡

立馬市發帑十萬金買器幣其宣府延寧酌近開歲市歲
之勒索定數市畢還京 上問嚴嵩請歲二市 上然之起
致仕兵部右侍郎史道兼右僉都御史赴大同經略邊事武
臣以京營叅將徐洪往

丙申南京禮部尚書萬鏜改刑部尚書戶部右侍郎傅鳳翔
為兵部左侍郎兼右僉都御史協理京營戎政南京戶部右
侍郎方鈺為戶部左侍郎提督撫治鄖陽右僉都御史任瀛
改提督操江

提督湖廣川貴右都御史張岳分勸苗寇去年九月進師攻



平之各哨斬獲殆二千餘人官兵稱龍許保已獲第未逮至寔未獲也


戊戌懷柔縣草場火

己亥浙江布右政政連鑛為右副都御史總理河道起於教右僉都御史經略易州

癸卯兵部貢外郎楊繼盛乞罷馬市略曰虜殘躡我八陵虔劉我赤子不能報而反與市損威重長寇仇甚矣今說者曰吾外假馬市羈縻虜而內得自寬備武備夫虜至逆也至無厭也人心憤之矣不及時激厲其氣用之而和以自弛使邊

人媮好衣美食忘其憤而懈于戰將愈隳豪傑効用之心何備之能脩往者邊人私通虜吏猶得以法裁之今導之矣是開百姓不靖之事也又不過曰得馬以資吾軍不知既已和矣馬馬用之且虜安肯捐其善馬以予我、歲糜數十萬而無所償于虜一不如意彼必敗盟以失信責我衅端百出此其害廷臣皆知之而莫敢惟 陛下獨斷 上以沮撓下鎮撫獄謫狄道典史

徐學謨曰時邊備久疎文武諸無一人可恃為長城故上不得已曲從馬市之議繼盛雖至忠謹亦未諳時宜故



密諭嵩有小人阻議國是紛々何由而定之語蓋意未嘗以繼盛疏為非是也特難大將軍之體不得不斥繼盛以重專閫之權耳未几而俺荅背約入犯無虛歲上始悔馬市之悞而史道所謂暫塞其欲而修我戰守若部閣大臣會議之言豈非共諛大將軍以欺上哉嗟乎有君無臣雖堯舜不能以治天下也


設遷曰俺荅攻偏京師其勢非弱小也俄而叩閫納質果前悖而後恭耶度非其心仇鸞聲言北伐怯不任戰彼前鎮大同賄之俾別寇宣薊則日者求款亦時義軍重賂購

之也嗚以馬市而出塞之師不復北矣故俺荅旋款旋肆人以為大羊無信不知嚮導在內不在外也楊忠愍欲雪城下之耻力爭馬市謂和議之別名誠犯主之顏然犁庭掃穴如衛霍耿其人者抑誰任乎是又不可以輕論也寶甲辰盡徵京省餘銀給馬市

江西左布政使戴鰲為右副都御史巡撫四川大理左少卿沈良才為右僉都御史撫治鄖陽

安南莫宏漢龍巖都統使

丙午上祈雨齋三日遣告郊廟群祀



南京吏部大計疏上降斥有差

裁直隸屯牧都御史令屯田御史兼理

丁未侍讀教銑為南京侍講學士署院

庚戌撫治鄖陽都御史任瀛南京尚寶司卿許穀司丞白悅俱察免

辛亥工部右侍郎梁尚德為左侍郎巡撫湖廣屠大山為工

部右侍郎

丙辰仍命禱雨

戶部右侍郎方鉞為左侍郎巡撫河南葛守禮為戶部右侍

郎總督倉場戶部左侍郎端廷赦為南京右都御史

四月己未朔湖廣左布政使翁溥為右副都御史巡撫湖廣巡

撫南贛汀漳右僉都御史改南京操江

癸亥設銅仁府撫苗通判

甲子周王朝垌薨謚莊王

己巳前兩廣總督兵部尚書張經改戶部尚書總督倉場督

理西苑農事南京光祿寺卿陸垹為右僉都御史巡撫河南


起張烜右副都御史巡撫南贛汀漳

庚午銅仁殘苗龍許保突入思州執知府李允簡及知事王

國權

嘉靖三十年

八



曰謙經歷羅蕙焚掠而去降總督張岳右侍郎戴罪視事允
簡釋歸卒允簡融縣人一云投崖死贈貴州按察副使廕子
入太學


增大同叅將四人


辛未設醮祈年于朝天寺宮

經略京城内外商大節言臣受命經略但叅酌奏助非有重
兵專責戰守也仇鸞以京城四郊分市委臣云平時則修築
訓練有警則相機截殺是京城利害臣一身當之矣鸞疏分
布人馬止留柔腕守九門自簡銳五萬道戰倘虜而有知一

衝鸞一趨京師進退失據昨年事可鑒且臣所得節制叅將
麻宗等巡捕軍耳鸞又屢調是巡捕軍亦非臣所有宜勅兵
部議巡捕軍或屬臣或屬鸞或屬兵部其脩築訓練費所出
并早裁焉 上怒其推避下鎮撫司獄法司擬失悞軍机論
死嚴嵩言大節雖推避非臨陣失机比請戍邊不聽始鸞由
嵩入既挾虜得 上重而驕嵩猶欲兒視之不應遂凌嵩出
其上嵩恚數密疏沮之

壬申沅江叛酋那鑑殺左布政使徐樾時官兵進討鑑佯遣
經歷張維詣南羨乞降樾信之至沅江受降兵突出悉死贈





寺祿寺卿錄一子巡按趙炳然請謚不報

丙戌大同鎮羗堡開馬市俺荅等就市馬二千七百餘匹虜
貪漢物互市不絕我歲費數十萬所獲馬皆駕下而小寇如

恒時

裁兩浙行鹽小票

五月戊子朔雲南總兵沐朝弼等攻那鑑于沅江賊突出敗叅

政郝維嶽副使李維餘軍未退

丁酉兵部左侍郎孫禮改戶部左侍郎總督倉場督理西苑
農事巡撫江西吳鵬為工部右侍郎右僉都御史王學益為

左副都御史

六 己亥故宣府叅將都指揮僉事李彬贈都督同知謚忠愍以

甲辰膳房堡敗沒

壬寅增戶部浙江江西河南雲南司主事各一

甲辰崇陽王顯休子英熒降封鎮國將軍顯休殺功兄顯榜
賜死不得襲

乙巳提督兩廣兵部右侍郎周延為刑部左侍郎巡撫湖廣

翁溥改江西

俺荅市畢貢馬九匹表謝勅賜衣幣仍許宣府延綏寧夏並

開市史道親詣經理

徐學謨曰邊臣以虜情盡感 上聽業已成習是時俺荅
方強目無中國其上表謝賜引罪疑俱屬道等自為之而
虜或不知也馬市安得久行哉

庚戌宣府新開口堡開市馬虜把都兒辛爰伯腰卜郎台吉
禿凡兒慎台吉就市易馬二千餘匹


辛亥停應天浙江等加派糧銀

六月庚申增神机營坐營官署都督僉事黃振專理火器
壬戌張熊嗣彭城伯張勳之弟

大理寺卿李春赴任愆期落職

經略侍郎史道索叛人蕭芥喬源于虜初大同市畢隨犯左
衛詰之云芥等導之皆亡蓮教亡命虜中不利款語俺荅彼
毒水上流伏甲市場若且殆左右復詭言芥源術能頹城又
樹黨左衛內應謀泄遁史道讓虜內媿使千騎隨芥源試
其術不效遂縛芥等三十餘人來獻

徐學謨曰是時 上以捷虜為念而惡勾虜之人邊臣不
思陡備而日捕亡人以獻彼蕭芥之存亡果何益于虜之
來去哉



癸亥宮人何氏薨追封睦妃

山東地震有聲

甲子戶部右侍郎葛守禮兼僉都御史督理宣大山山西糧餉
汰內府各監局工匠

丙寅福建布政司左叅政王機璣為右僉都御史充徐淮充
歸招撫營田使順天府尹馬坤為大理寺卿

前應天府尹孫懋卒浙江慈谿人正德辛未進士令劍各擢
南給事中諫南巡劾錢寧遷廣東副使坐擅笞緹校逮詔獄
謫藤縣典史後歷京兆行誼端潔居官有聲贈右副都御史

乙亥提督漕運兵部左侍郎兼右僉都御史應禎改提督兩
廣軍務兼巡撫應天府尹鄭漳為南京刑部右侍郎

山西按察副使尹綸調入京統民兵

貴州苗龍保許被擒叅將石邦憲購諸苗伺龍許保飲別寨
縛之諸將欲罷兵張岳不可謂吳黑苗未誅必為他日患仍

購捕

丙子金星晝見六日


丁丑巡撫陝西鮑象賢改雲南

辛巳禮部左侍郎程文德治睦妃何氏墓言金山壟陘宜故

國權

嘉靖三十年

十二



宜妃包氏靜妃陳氏同窆 上遂定九妃同墓共一享殿

壬午廣西徭賊劫慶遠府庫殺人

癸未脩通州城竣

仇鸞請以京兵民兵合營迎虜大戰邊兵出外擊虜零騎兵
行許食民禾戶部戴煤以從嚴嵩疏止之

丙戌南京戶部右侍郎駱駟為戶部左侍郎總督漕運兼巡

撫鳳陽陝西左布政使賈應春為右副都御史巡撫陝西

兵部左侍郎傅鳳翔平贈右都御史

新野縣蒼山廟之白龍潭龍起水湧陡二丈溺人畜潭移百

十步後復平

七月丁亥朔收各處勇敢自備械騎勦虜者

已丑仇鸞奏借民田車備戰守不許

俺荅偽使蕭芥入市我擒之


庚申購龍涎香

免延安旱災田租

癸巳時南京科道薦故御史王璜咎如思編修唐順之刑部

主事唐樞山西叅政胡松皆邊才以浮譽報罷

叙擒叛人功進仇鸞太子太傅廢錦衣副千戶史道兵部尚



書賜金幣有差鸞舍人時義官錦衣指揮僉事

丙中海州衛地震燕河營草場火

董卜韓胡宣慰使司加渴瓦奇入貢使至五百人又招撫二

百六十人禮部請定額百五人否則閔吏謝不納從之

己亥開淮安三里溝運舡由淮入河初總督應楨言向者黃

河入海直順流而東故開清河口通黃流以濟運今其下流

如澗口安東等淤高河反壅而倒流從清河口灌入沙為澱

今欲引之如故宜鑿澗口疏支流沛河東注之勢恐卒難就

三里溝在黃淮二河未合誠令開濬而舟自溝行出通濟橋

沿淮以達河道里亡損且可省費從之

庚子移靈州叅將于橫城平虜守備改叅將

壬寅滇兵討那鑑不克

乙巳壽王祐楮薨謚定王七子還葬西山

徐學謨曰安州在漢南地最瘠空負薄壽王都之享國最

久以無嗣絕封後景王即其故邸續封亦四年而絕豈地

少高山大川漫衍陀羨龍氣無所翕聚耶


甲寅左通政趙文華為通政使南京太僕寺卿陳儒為南京

戶部右侍郎摠督糧儲

國權

嘉靖三十年

十四



八月己未初馬市議幣布米麥易虜馬半半至是議富虜馬易
幣負虜半半易菽粟史道言其便朝議虜欲無厭既易幣布
復請菽粟後難繼也議久未決道復以為請搃督宣大蘇祐
巡撫何思等懼後禍各言不可一牛數庾一羊數釜米如珠
而牛羊如山竭廩不能厭也虜無親而貪寒盟其心耳市虜
以邊安也朝市暮掠何危如之勿許使仇寧惑之請廷議俱
右祐等上以問嚴嵩亦如之有旨不許專意戰守已俺荅
謝衣帽之賜乞職役誥命上讀之即召道還京然邊臣尚
與互市紓急逾年虜好復絕

辛巳命仇鸞以兵二萬七千餘人赴白羊口分布關隘

壬申周府湯溪王勤烜薨


叛人蕭芹張攀龍呂明鎮王得道喬源邱阜劉景陽等伏誅
戊寅仇鸞請討朵顏導虜之罪兵部尚書趙錦及搃督侍郎
何棟等各爭之得寢

乙酉兵部尚書史道兼左僉都御史協理京營戎政

九月丙戌朔巡撫河南陸垹疾去

制勅房通政使張文憲為工部右侍郎

仇鸞以家丁劫趙時春民兵營自辨乞休不允慰之



己丑光祿寺卿高澄為右副都御史巡撫河南

乙未京師地震

弋陽王拱橫薨

戊戌科都給事中何光裕等御史龔愷等劾兵部尚書史道馬市之議委靡遷就馬市開矣即欲易米穀米穀塞矣即欲請封號令觀虜表意在請乞而道日謝恩况表不虜撰其設心為何宜斥亟道上以窺旨光裕愷各杖八十餘奪歲俸光裕卒杖下

辛徐學謨曰史道倡馬市以辱國罪在不赦光裕等論之似

矣第不如楊繼盛先事而言乃揣摩上意方追捕其疏

安知縣上之不可欺乎

辛丑評事陸從大為禮部主事改禮部主事張天兵復部

主事徐學詩為吏部主事吳蘭郭東藩進士吳國倫嚴杰為


中書舍人直制誥制勅兩房嚴嵩欲用其私人吏部竟訪上

壬寅吏兵部右侍郎應大猷聶豹為左侍郎戶部右侍郎葛

守禮改吏部右侍郎

免九江饒州承天襄陽災傷田租

曲周盜李邦珍流劫山東鉅野河南太康等縣轉入亳州



建山東莒州知州胡川楫日照知縣馮舜田先是樂安盜孟
尚守見捕急賄莒州同知賀朝宣而逸因二十騎薄日照執
典史高邦彥百戶李濟至邳州官兵殲之
戊申罷南京祭酒閻樸以赴任稽緩
己酉免蘇松常鎮寧國太平鳳陽徐邳宿潁河南災租
十月丙辰免順天河間真定保定順德廣平大名永平災租
丁巳史道被劾乞休不問
庚申巡撫遼東蔣應奎為戶部右侍郎左春坊左諭德茅瓚
為南京祭酒

免遼東屯租徵浙直織紵絲紗羅八萬六千三百匹

壬戌免山東田租丁卯免銅仁思恩田租

己巳摠督蒞遼侍郎何棟構擒朵顏衛逆夷哈舟兒陳通事

于白馬等關


免山東兗州田租

庚午改葬哀冲莊敬二太子于天壽山

壬申駐守昌平州都御史許宗魯為右副都御史巡撫遼東

吏部尚書李默削籍會推遼撫江西布政使張臬謝存儒

上切責之疏謝忤旨默自浙江布政使以陸炳薦用嚴亦氏



右之及典銓不為嵩誑因密揭默狗私市恩也默雖謫去與
輿論稱默不阿得六卿體

史道再乞休許之

甲戌改提兵官徐珏駐保定副提兵朱楫分駐易州聽節制
初並駐保定

丁丑召通州督餉都御史王忬易州經略都御史於敖入京

丙子刑部尚書萬鏗改吏部尚書

癸未高州地震如雷

上作承天府儒學碑

十一月丙戌誅叛人哈舟兒陳通事舟兒本甘州人進通事名

志亮俱逃虜中役于朵顏為嚮導患邊

丁亥吏部左侍郎應大猷為刑部尚書於敖為右僉都御史

駐守昌平

戊子大理寺卿馬坤為戶部右侍郎檢討林廷機為司業

巴丑前禮部右侍郎許成名卒山東聊城人正德辛未進士

授編修歷至前官


庚寅岷府善化王譽桔薨

告郊廟大賚群臣進仇鸞太傅兼太子太師詹錦衣指揮僉

國權

嘉靖三十年

六



事總督何棟左侍郎廕千戶總兵成勳進都督同知巡撫吳
嘉會右副都御史餘陞賞有差嚴嵩子世蕃進工部右侍郎
廕錦衣千戶徐階少保吏部右侍郎李本進禮部尚書禮部
尚書孫承恩進太子少保朱希忠進太子太師右都督陸炳
進太子太保前尚書史道尚書趙錦加太子少保各廕錦衣
百戶俱內直贊立功
辛丑巡撫河南右僉都御陸邦辛浙江平湖人丙戌進士
癸卯禮部右侍郎程文德為吏部左侍郎南京大理寺卿郭
鑒為大理寺卿

甲辰戶部右侍郎馬紳為右僉都御史督理薊州遠餉

乙巳令巡撫官久任

丁未福州地震

庚戌前南京工部右侍郎嚴時泰卒

癸丑禮部右侍郎孫陞為左侍郎太常寺卿閔如霖為禮部

右侍郎

十二月甲寅朔陝西馬市成總督王以旂等陞賞有差


丙辰仇鸞欲移大寧都司于薊鎮慮安王重遷先免大寧所

屬外衛班軍京操改防薊鎮兵部言改成甚便報可

國權

嘉靖三十年

九



癸亥左春坊左庶子兼侍讀學士吳山為太常寺卿署祭酒

乙丑群臣表賀靈雪

前兵部左侍郎詹榮卒山海衛人嘉靖丙戌進士歷戶部
中督餉大同適卒叛榮計定之開門延官軍事遂平進光祿
少卿歷撫甘肅改鎮大同四歲繕亭障治軍實吏民安堵榮
去後歲中虜矣

丙寅南京侍講學士教銑為左春坊左庶子兼侍講學士

丁卯寧晉伯劉良璽卒

甲戌設摠報大典于大高玄殿醮七日

乙亥封恬熾安慶王恬熾潘王順埔信陽王厚頰襄王在鉞


周王勤燭沈邱王承燾內江王融焚永福王高榘豐林王是
日傳制正使懷柔伯施燾不至命事竣治罪

南京司業盧宗哲為南京南尚寶司卿

刑科給事中李幼滋江西道御史李一瀚核餉宣大自元年
為始

虜屢掠大同詰之曰此貧虜掠食耳即中國能禁民勿盜乎
俺荅復約河西諸部內犯史道諭止之

是年平緬酋莽瑞體據古刺宣慰司殺其酋長遂入孟養八



百老過瑞體莽紀歲幼子避思倫發法難奔洞吾近于古刺
古刺兄弟相攻為解之遂擁眾絕其道路二酋皆死盡有其
地緬自此始強

國權

鹽官設遷孺木著

嘉靖三十一年壬子

正月庚子朔八上不朝

丙戌金星晝見甲午沒


丁亥仇鸞見邊警旁午懼開市見謹請諸臣各脩戰備每鎮

簡銳萬人歸臣如犯古北口毋扼虜俟深入中外夾攻之兵

部尚書趙錦謂深入我傷必多鸞議詘

虜分犯左右威遠高山衛懷仁山陰大殺掠至戊戌乃出

國權 嘉靖三十一年



國家圖書館, NATIONAL CENTRAL LIBRARY, TAIWAN, R.O.C.

壬辰虜入石匠河掠威遠城

命戶工二部核帑金出入以聞

甲午東安大水免田租

前總督漕運右都御史魏有本卒浙江餘姚人正德辛巳進

士歷官年久精敏有吏才而卑諂近利時論少之

虜三千騎入弘賜堡求市御史李逢時以非期卻之遂攻陷

羊屹塔等堡

乙未延綏馬市成賞吉囊狼台吉衣帽如俺荅把都兒

遼東總兵李琦劾免宣府總兵都督僉事趙國忠移遼東

丙申命遼東苑馬寺卿張思蕪開原兵備轄金復蓋州三衛

丁酉更定邊方官陞除降調格巡撫僉都御史三年滿進副

都御史封廕副都御史滿進侍郎恩廕亦如之侍郎滿右進

都御史右都御史進尚書量加官保俱留任必六年以上

始內召守巡知府滿三年進二秩稍淺進一秩視內地量減

年資不易地

戊戌檢討玉材為南京司業


己亥夜月食

辛丑虜數犯大同仇鸞不自安請出塞搗虜上以問嚴嵩

國權

嘉靖三十一年

二



嵩知其淫酣無圖志謂須擒斬虜首方為上功上不許語
驚若零虜無煩卿也

海盜蕭顯以二百人餘犯松江吳淞所泊宋家港宗明兵屯
浦東听戰敗顯遂偏上海東門僉事董邦政拒之二月戊午
始解去邦政遣縣丞劉東陽兵追之敗死兵備僉事任環再
擊卻之
癸卯延綏總兵官署都督僉事吳昂移宣府
甲辰禮部尚書徐階請裕王景王冠婚令上儀注階等先裕
王上命俱三月

張萬紀章迺楊海秦梁張允中祁清楊魏賀涇為給事中狄
斯斌王宗茂楊敷陳觀衡宋儀望吳遵陳學夔毛鵬段錦朱
寵陳瓚吳百朋張守蒙孫昭羅鴻宋賢李楨郭民敬朱綱金
湖徐械汪克用等俱為試御史其清經綱宗茂湖械克用等
俱南京
丁未巡撫山東王積為南京兵部右侍郎

宣府巡撫劉璽言自開互市以來大同多盜而宣府宴如容
臣漸次糜虜兵部謂原額五萬金馬五千匹雖歲數市可也
許之



靈州參將韓欽為署都指揮僉事提兵官鎮守延綏

辛亥罷江西按察副使鄭世威坐稽任

壬子右僉都御史王忬巡撫山東

二月癸丑朔西苑新宮更名永壽宮

宣府大同大飢人相食量借軍餉賑濟遣前督餉侍郎馬坤

賫帑金三十萬往

甲寅作裕王景王府

丁巳兵部左侍郎聶豹左副都御史王學益同侍讀郭朴清

理軍職貼黃

虜寇大同鎮羗得勝二堡圍參將孫麟于洞兒溝游擊呂勇

劉潭救之虜分騎迎戰各身免虜還攻二堡不下而遁

是日又千騎犯弘賜堡

己未俺荅移帳並天城平虜堡住牧兵部請中軍令許臨陣

總督得斬都指揮以下官總兵得斬士報可

庚申舉歲例大祈于高玄殿停刑禁屠五日

辛酉虜三千餘騎寇大同威遠等堡指揮僉事王恭戰于平


川墩敗沒參將張騰擁兵不救虜由高山城南下大掠懷仁

縣俺荅入大同塞指揮王恭死之先是上諭兵部大振兵威

國權

嘉靖三十一年

四



用張殺伐尚書趙錦上言大將仇鸞領入衛邊兵六萬八千
天下精兵無以踰此若復觀望依違坐悞事机臣等萬死何
贖第鼓勇奏功以副 皇上眷遇之隆則在大將軍當自盡
耳鸞懼畏懦不敢發兵又恃通市不為戍守大同總兵徐
仁復驕縱百務廢弛巡撫何思亦以通市禁邊軍敢拒殺者
抵死故北兵出入關隘無忌動稱貢市有司餽廩惟謹其狡
黠者易服入城奸辱婦女莫敢誰何至是萬騎入塞抵懷仁
縣之管家堡大掠總兵徐仁副總兵王懷邦叅將張騰游擊
劉潭各觀望不進潭又陰約營路獨中軍指揮王恭戰于管

家堡力屈死之

癸亥鳳陽地震有聲

乙丑命仇鸞逐虜鸞制大同大邊次邊墩軍止守三邊時虜


並邊駐牧大邊次邊反隔在外懼通虜泄漏故掣之

丁卯太上道君誕辰建醮永壽宮九日

己巳營內教場

壬申修太和山玄帝宮

丙子大風霾湖廣守備太監陳德訐奏都督蔣華當祀大不
敬廉其事不寔逮德詰狀貫華不問



丁丑召還保定督餉主事專責巡撫兵備官

定裁革武職條例及南北印馬御史三年一遣不候代

庚辰逮大同失事叅將孫麒游擊劉潭先是總督蘇祐虛報
虜騎三萬定二千騎切責之

自弘賜堡拒市後虜屢求款不之應至是夷使了頭智復至
云否且入犯通事官林蕞蘭誘縛之智曰殺我易耳中國不
得休矣總督蘇祐上功島智塞下

壬午械大同叅將張騰千戶王舉等入京

游擊將軍時陳值虜大同西路擊敗之虜二萬騎奄至相持

兩日而退

叅將盧鐘搗賊宋家港掠其舟巨寇陳義間入松江城識者
密擒之餘皆遁于浙

倭突浙江定海閩奪舟閩人擊卻人之王直移金塘之烈港


云定海水程七十里而近奸徒日附夷航孔棘

三月癸未朔裕王景王冠

乙酉福州地震

丙戌山西地震有聲

丁亥代府饒陽王充黜言總督徐仁狃和戎一等莫展游擊




劉潭詭虜負馬巡撫何思不加審輒勤朝使以幣至實無一
虜諸將懼而招市勿給賞副總兵王懷邦几被擒賄免近虜
酣飲館舍虜益橫諸將禁殺虜如殺人之罪宣府亦開市宴
然則處置得宜也事下巡按御史李逢時逮徐仁詔獄何思
王懷邦免官改駐守昌平右僉都御史於敖巡撫大同宣府
副總兵孫時雍暫總兵大同
戊子命仇鸞率兵赴大同逐虜過昌平供帳擬于乘輿一鷲
至三金道路以目
己丑總理漕運都御史駱顯南京兵部右侍郎王積俱被劾
顯免積疾去

辛卯少保禮部尚書兼東閣大學士直閣仍部事山東按察
使周琬為右僉都御史駐守昌平

甲午裁山東海右道僉事改青州兵備僉事為分巡副使
總督河道右副都御史連鑛總督河道兼巡撫鳳陽山東左
布政使謝存儒為右副都御史巡撫河南

乙未起歐陽德禮部尚書德方守制上急之俾服闋即入
諭吏兵二部更置宣大文武官吏宣府副總兵孫時謙中路
叅將柴縉游擊將軍姚冕大同西路叅將朱雲漢皆免



己亥河南右布政使曾鈞為右副都御史總理河道

辛丑肅府淳化王真泓薨謚端惠

壬寅總督薊遼侍郎何棟分薊鎮為八區各奉將領之

故大同指揮僉事王恭贈都督僉事廕正千戶

甲辰海盜犯廣東瓊州殺指揮陳忠言胡松百戶都瑛

丁未定遠右衛軍餘徐打成陷虜入之至是假凡力其山衛

指揮納兒勅貢馬事覺伏誅

己酉倭九十餘人登松江南門焚掠千戶童元戰死

辛亥確各省通課

前南京吏部尚書張潤卒臨汾人弘治壬戌進士居官有聲

贈太子少保謚恭肅

壬子存問唐府郾城王彌鉞年八十有賢行

奪戶部尚書孫應奎俸二月郎中汪宗凱削籍坐信奸高奏


開水鄉鹽引也

松江各賊期黃浦出海會大風雨覆馬復登岸分據周浦下

沙新場川沙陳東蕭顯徐海分據柘林作犄角襲南匯所哨

官李府戰死決旬把總婁宇練壯勇伺賊零劫勦殺之賊遂

畏婁宇兵



四月癸丑朔河間知府尹耕為河南兵備僉事仍四品服俸轄民耕兵自承知州起廢數月遷兵部員外郎出守給事中李幼滋劾之至是吏部希嚴氏稱其知兵割用給事中張萬紀歷數其婪狡不法且四品改五品有乖選法上怒逮耕鞫問以嵩故竟無重譴


乙卯諭兵部促仇鸞決戰鸞始出師屯兵三十二萬騎十八萬鸞誇虜強盛意脅和徒藉兵為威重殊無意行也鸞恨嵩而侮之其所詆譏嵩上亦心動宣召略稀錦衣衛右都督陸炳與鸞爭寵及厚收炳伺鸞出鎮川堡至猫兒庄姑嵩

伏虜起溝中喪卒二十八人傷二百十二人共馬二百餘匹斬虜五級

丁巳倭寇五百餘人步自上海偪松江府東門癸亥倭續至八百餘人

乙亥賜仇鸞金幣以鎮川堡之役兵部難之上以吏卒暴露稍錄之

丙子海盜自浙江舟山象山登岸流劫台溫寧紹攻陷城寨掠殺亡筭先是海盜番人多倭少斂人王直任挾好施與躡身販暹羅日本諸國從渠帥許棟司出納漸行貨于倭引其



人至直又計殺別部陳思昉自是海盜俱受直節制凡中國
之醜民罷吏衣冠無行生羶而附之招徐汝陳東葉明辛五
郎為將領揚言宣力本朝指所殘破云某島寇也以殺思昉
功叩閔告捷求通市勿許乃引倭據定海縣之烈港並海郡
縣交聳攻游仙寨殺百戶秦彪已寇温州破黃巖巡按御史
林應箕告急遂議復巡撫提督浙閩各設叅將領成

庚辰臨安沅江地震

五月壬午朔臨安復地震

倭七百餘人薄松江城礮中二酋死王兵斃二首賊退入白

龍潭寺流劫時巢柘林分趨太倉崑山


戒諭邊臣

癸未增兩淮浙江鹽巡都御史

甲申韓士英為戶部尚書戶部尚書孫應奎調南京工部尚
書屠楷為南京兵部尚書罷大同巡撫於敖

停宣大選兵入衛召仇鸞還京鸞不自安乞休不允鸞在鎮
騷驛與家卒爭妓守備沙潮不堪命自刎

已丑山西兵備副使侯越為右副都御史巡撫大同
乙酉順天府尹王紳為右僉都御史清理浙淮鹽法



壬辰久旱命順天府尹禱雨百官脩省齋三日

福建盜李文彪等寇南安提督軍務右副都御史張烜遣兵
禦之于玄都嶺敗績

庚子玉山王厚燠薨謚恭安

辛丑夜月犯土星

壬寅倭陷黃岩縣殺署知縣事武晞七日而遁

癸卯雲南地震

丙午大雨百官表賀

虜八百騎圍陝西紅城子堡尋退

脩宜春宮

戊申復許讚少傅吏部尚書文淵閣大學士

南京工部尚書潘璜改南京吏部尚書

六月癸丑仇鸞請調京兵守宣大薊州各三千人報罷會上疑

鸞權重稍裁之鸞情不知懼


已未免淮安鳳陽水災田租

工部主事胡朝臣謫外督造軍器冒破時陞通政司右叅議

戊辰勅楚王英燠約束宗室

庚午核王府侵占里甲庄田之稅即充歲祿

國權 嘉靖三十一年 十一



甲戌城直隸順義縣

乙亥給宣大馬各千匹

丙子罷戶部尚書韓士英時未至被劾
丁丑宮人王氏薨追封麗妃謚恭僖

禮科給事中袁洪愈劾檢討梁紹儒交通權要吏部郎中白璧招權鬻爵至姑婦爭攫金錢俱宜斥并尚書萬鏜貪老侍郎葛守禮督餉宣大刻削上切責鏜守禮令對狀下璧鎮撫司削籍紹儒免紹儒父事嚴嵩不能庇則上性嚴馭也仇鸞奏四出塞斬級八十賞吏卒有差

己卯雷州大雷雨火毬見天中星散海溢大壞田廬人畜


庚辰南京刑部右侍郎鄭漳劾罷

仇鸞請調遼東固原甘肅寧夏兵各三千人許之
倭陷鄆衢城

七月癸未詔開例軍民納馬

河朔兵至盧鏜擊川沙倭中伏敗

俺荅由莖狐墩犯宣府叅將史略禦之寇預伏略方依崗為陣胡騎衝突火器猝不及發又佯却官軍前追數里伏發截官軍為二略與守備任鎮死之士卒死傷過半



丁亥申明南京內監薦新格式

戊子增太僕寺丞一免山東班匠徵金解京

庚寅右春坊右中允蕪脩撰尹臺郭鑿主試應天

辛卯萬全都司地震

壬辰戶部右侍郎馬坤為左侍郎順天府尹盧紳為戶部右

侍郎大理寺左少卿倪薦為右僉都御史

癸巳浙江左叅政曹汴赴任踰期劾免

乙未夜月食免平涼鳳翔延安災租

戊戌命兵部侍郎張時徹工部侍郎吳鵬從大將軍蓋祝鸞

請之一主調遣一主器械

庚子司經局洗馬黃廷用被劾改南京主部負外郎

壬寅巡撫山東王忬改提督軍務巡視浙江蕪福興漳泉許

便宜從事并設浙直叅將以瓊崖叅將署指揮僉事俞大猷


為溫台寧紹叅將中都留守司指揮僉事湯克寬為福興漳

泉叅將

東閣大學士徐階請二王講學詔擇吉行

潘府定陶王銓鑼薨謚恭靖

癸卯南京右都御史端廷赦平安徽當塗人正德辛巳進士



夜月犯畢宿大星

丙午增貴州宣慰司儒學廩額四十人

己酉起張珩右副都御史巡撫延綏前成邊六年山東左布政使

沈應龍為右副都御史巡撫山東

八月癸丑唐府郾城王彌銀薨謚恭端

甲寅鄭府廬江王祐梲獻瑞穀告廟受賀

虜俺荅把都兒打來孫等聚薊州近邊謀犯喜峰古北口仇

鸞疾命諸路兵聞警即入無俟徵調協理戎政侍郎蔣應奎

申飭守備

己巳左春坊左庶子兼侍讀郭朴脩撰秦鳴雷主試順天

戊午少林僧兵應募至擊柘林倭以鉄棍斃賊一賊伴死反

刃刃之僧兵潰

己未收仇鸞大將軍勅印侍郎蔣應奎署京營游擊將軍時


陳為都督僉事戶部左侍郎孫禴改兵部左侍郎兼右僉都

御史俱提督軍務時鸞疽甚求與疾出師免陞辭不許會宣

薊警日至兵部尚書趙錦以印在大將所諸偏裨令不行自

請假大將軍出禦上謂本兵不外詔鸞納勅印錦即夜至

鸞弟收印綬徐階言鸞疾未愈乞早賜斷處



辛酉慶府宜寧王高樺薨謚安惠

壬戌乾光殿成

仇鸞死鸞聞收印綬恚憤疽益劇先是見夏言曾銑斧其後
俄疽孽

甲子編脩高拱檢討陳以勤直裕王講國子助教尹樂舜鄭
守德改翰林待詔侍讀中書舍人吳昂吳應鳳侍書檢討孫
世芳林煥直景王講助教潘靜深邢臺教諭李秀改待詔侍
讀中書舍人叢怨吳自成侍書

乙丑江西試院火

己巳裕王景王出閣講學

壬申大理寺卿余允緒為戶部右侍郎提督倉場督理西苑
農事允緒時入賀當謝不至落職


南京

乙亥追僕仇鸞于市籍其家初大學士徐階密疏鸞通虜悞
國而錦衣衛右都督陸炳早刺鸞陰事備悉之鸞死怵其義
子錦衣指揮時義侯榮姚江逝之虜而道執之乃發鸞先鎮
大同賂虜遺矢毒約轟約不犯今事發亡命勾虜 上怒
廷鞠當謀反律梟鸞其妻子及時義侯榮姚江皆斬女妾給
功臣家餘黨戍邊下制暴其罪鸞少讀書能文頗有勇略然

國權

嘉靖三十一年

十五




貪戾險狠累鎮兩廣甘肅輒評督撫庚戌自大同入援最寵
信因縱恣取禍其坐謀反非實也鸞剖棺與丁汝夔楊守謙
同月日人謂其報不爽

徐學謨曰國史紀鸞始末時不聞徐階言之或有之而外
朝不知耳鸞先于嚴嵩合陷夏言曾銑其交甚固權勢相
軌軋寢不相得鸞遂密疏嵩行事為上所信不宣之入
直嵩見徐階李李本入西內即同往西至華門者以無
旨不納嵩還第對泣仍卑詞乞階為解陸炳從中調停乘
鸞死已先為殛鸞地或愆忠階上書以實其罪于是鸞族

而 上益信嵩無他遣所御龍舟迎嵩于閣西渡得
入直如初而嚴氏之勢益熾不可向邇矣

高岱曰仇鸞以庸暴之資叨非常之寵禦寇則束手無策
亂政則驕劫橫生 皇上初以專任責成之心望其有委
身報主之績而不虞其負國之至此也蓋自其擣巢無功
而歸聖心已不能無疑矣然猶惟其言而莫之違者亦駕
馭之真一獲之報耳使少延旦夕之命必不免生赴市曹
矣當時或疑鸞反予曰鸞不反即反無足憂撲滅之孤豚
腐鼠耳古奸臣反逆者其始皆憑恃寵靈建大功以懾天



心乃可劫人之心鸞搃諸路之兵握專閫之柄而不能少
過孤軍深入之虜此其人豈能反哉其跋扈而不可嚮邇
者不過竊一時之權以肆其毒耳嗚呼鸞不足責矣使國
家有任事之臣朝廷何至委大權于狂豎子哉夫國家之
養士凡二百年而緩急之際竟一無所恃乃使奸宄之徒
得以亂國干紀群臣亦何得辭其責也

設遷曰鸞在時九推舉將才輒首之究其用澤中之麋耳
不知何以被此虛譽也驕子亡狀啼嬉俱作噉人態鸞真
其類也由嚴氏蘊崇之不戰將自焚乃藉通虜夷滅之鸞


京師故石亨所也再得貴將再赤族古人所云凶宅信乎
大同軍五百人出塞二日搗虜斬八級被追轉戰二百里夫
二百人把搃劉欽旗牌官范世傑死之

丙子福建叅將湯克寬請募徐邳盜為兵許之

戊寅免山東兗州東昌水災田租

豐城侯李熙搃督京營戎政

已卯虜二萬餘騎寇大同平虜衛分兵深入朔應山陰馬邑
攻夷村堡殺掠數千人自盤道口欲犯閩南不克
九月庚辰朔虜自紅土堡出塞是日又虜三萬騎自弘賜堡入



掠左右衛及東安十七衛大同懷仁二縣

壬午虜自鎮川堡北遯又萬騎自威遠威胡等堡犯平虜衛

仍散掠朔州馬邑山陰

朔州馬邑地震

前大理寺卿葛浩卒浙江上虞人弘治丙辰進士今蕪湖拜

南御史劾逆瑾除名起守邵武居官直節顯家居讀書內行

甚修時論許之

丙子免平陽旱租賑淮安鳳陽揚徐水災飢民

戊申虜數萬騎犯神池利民等堡山西總兵李涑禦卻之斬

二十二級

十月壬子工部員外郎樓鎮作景王邸于德安

工部右侍郎吳鵬改刑部右侍郎

癸丑禮部尚書歐陽德入朝大學士徐階解部事

友大綸曰嚴嵩柔奸變幻簸弄一世而華亭外託恭謹中

實深刻嵩引以同升而不虞墮其術中也

寧夏地震有聲


丁巳倭又攻青村所指揮徐承宗千戶葉緒出擊之中伏失

亡二百人

國權

嘉靖三十一年

大



戊午兵部右侍郎張時徹為左侍郎起楊博為兵部右侍郎
右副都御史王學益為刑部右侍郎
南京廣東道御史吳山王宗茂劾嚴嵩貪黷數十事、皆有
實并論吏部郎中萬家附權納賄 上怒其恣肆謫平陽縣
丞憂去壬戌卒隆慶初贈光祿寺少卿
己未兵部尚書趙錦戍極邊光祿寺卿董懋中編管塞上前
錦撫大同懋中為職方郎中皆附仇鸞給事中郭鏞追論之
按錦諳邊事本兵時多失鸞意坐黨禍頗寃錦懋中少年練
典故庚戌後邊事倥偬口占題覆日數十上敏決如流

起翁萬達兵部尚書

遼陽地震有聲

庚申秉一真人陶仲文陰兵懾虜加歲祿百石廕子入太學


壬戌免南昌臨江吉安瑞袁撫贛南安旱租免大名保定河

間順德廣平水災田租

甲子裁太僕寺添設寺丞

選二王婚

丁卯防秋畢命提督侍郎孫禴還朝罷守邊卒量地之遠近
戍之



夜月犯井宿

己巳虜小王子打來孫等數萬騎寇遼東錦衣殺掠千餘人
總兵趙國忠禦卻之斬四十七級各堡壯士斬八級獲馬二
二百十匹戰傷三百三十餘人

庚午巡撫遼東都御史許宗魯漕運總兵官郭琮並劾免

辛未兩廣總兵鎮遠侯顧寰移提督漕運鎮守淮守

癸酉山西左布政使江東為右副都御史巡撫遼東

岷王譽榮薨謚康王

定西侯蔣傅總兵鎮守兩廣

甲戌兩京停刑

戊寅兵部左侍郎張時徹請釋商大節奪俸


十一月己卯朔裕王景王妃入宮

辛巳周府封邱王安湜薨謚端惠

壬午巡撫四川戴鰲劾免

癸未提督軍務兵部左侍郎孫禴仍改戶部左侍郎總督倉
塲督理西苑農事

復楊繼盛兵部武選負外郎繼武以狄道典史遷諸城知縣
甲申禮部奏累朝親王婚禮洪武間以父婚子皆行禮禁中



將之出而復出外府弘治宣德間以兄婚弟移出外府既成
婚而後之國今二王婚禮似當從 皇祖之制行于禁中得
旨行禮外府

庚寅陝西左布政使張梟為右副都御史巡撫四川

癸巳前兵部尚書翁萬達卒未及聞命萬達揭陽人嘉靖丙
戌進士授戶部主事歷守梧州時討安南資其畫擢副使右
叅政累進兵部右侍郎_左提督宣大屢破虜入本兵憂去庚戌
奪情 上選其至貶右侍郎尋免歸蓋強執忤嚴嵩媒孽之
然邊臣諳机宜言中旨竅首萬達年五十五隆慶初贈太_矣

子少保謚襄敏

霍尚守曰夢化甫 夢熊為予言邊閩重臣往 擁兵自衛

謀報虜至惟武弁赴敵勝輒攘功敗即掩罪甚且縱虜出
入掩敗為功上下相遁曾有躬出禦虜介而先驅若襄敏
者耶予觀公安邊之術大都有十選將校撫士卒固險要
飭守備廣庠畜明賞罰嚴詰邊謹使謀獎豪俊急救援經
畫布置詳密周悉豈非折衝之宏謨保障之長策哉


乙未核宣大兵餉

丁酉夜月犯鬼宿

國權

嘉靖三十一年

五




乙亥大理寺卿郭鑿為工部右侍郎

銅仁叅將指揮僉事石邦憲為署都督僉事總兵鎮守貴州
辛丑總督湖廣川貴兵部右侍郎張岳擒銅仁叛首吳黑
苗黑苗以捕急深自匿岳故緩其令盡釋親黨密檄土官索
之至是土官某襲斬之驗實岳報用兵事竣

高岱曰諸苗最爾之地早罄三省之力討之十餘年不克
寧者豈其用兵之難果如是哉此非苗之難克眾議之難
協而事權之難定也萬鎧始集諸路兵亦稍有斬獲乃見
犒賞之惠足以賈諸蠻一時之安即謂可保亡虞輒班師

去何厭兵之過也張岳力主用兵不惑撫臣之說而陰沮
旁撓因循不決歷三年始收一戰之功其初不克屢有敗
衄者亦其乏素定之謀而地利之未諳耳然岳于人臣任
事之忠可庶几焉但庚戌于二月疏報全捷謂已除掃窟
穴首逆就擒而辛亥二月賊復出破思州設何容易哉其
後必欲得吳黑苗而後罷兵者豈亦有懲于前與則知狄
青不輕信儂智高之死有見哉固後世事君者所當法也
免大同電災田租增南京浦子口邏卒
總督湯克寬敗于朱涇初相持自邠至酉克寬以謁直指離



所部遂大潰

十二月己酉朔選民女三百人入宮

壬子泰寧侯陳瑋卒

總理河道右副都御史曾鈞言治河方略疏築兩用但施之

直隨地以宜耳臣按視房村宜疏淪徐州高廟抵邳州沂河

宜護隄役五萬六千人度二月罷費十一萬三千有奇從之

癸丑夜倭乘雪襲陷青村所

甲寅朝鮮國王李岷言國初賜樂器敝壞求律管仍遣樂官

赴京習之報可

乙卯廣東化州地震大柱山忽有聲如雷

丁巳鄭府廬江王祐楫攝府事厚院既廢祐楫從叔也

內官監太監杜泰提督光祿寺貪甚乾沒巨萬光祿少卿馬

從謙劾其罪泰亦誣從謙誹謗不忠狀巡視 科給事中孫


允中御史狄斯彬劾泰如從謙言且劾寺卿高耀失核命下

從謙泰鎮撫司獄上允中彬謫下吏從謙杖八十遠戍泰免

從謙卒杖下

戊午巡撫陝西張鎬失事劾免

工科右給事中李用敬奏開膠萊新河曰膠萊開新河在海




運舊道之西元人開之避海島之險未竣功先是山東巡海副使王憲按元遺跡鑿馬家濠以通淮安商販立新開八蓄泄導張魯白硯諸河今淮舡由淮河直抵麻灣即新河南口也海倉抵天津即新河北口也南北僅三百三十餘里各通潮其淤量濬可百有五里深濬三十餘里元人任其二今當任其一乞選才臣亟為條舉部覆從之

徐學謨曰膠河之議起于王獻子道直庚戌進士與同年閩人何廷鈺言之後廷鈺為御史龔獻言同李用敬奏行之竟亡效廷鈺因敗官所謂元人已開其二以其功之可用也而未開其一必以咀梗疏鑿難施耳不然以勝國民力之饒豈不能收其全績而有俟于今日之任其一哉漢人有言有非常之人而後有非常之功延至萬歷間尚有妄意成功者何怪其紛也

壬戌南京大理寺卿盧勛調大理寺卿

丁卯夜月犯木星

戊辰封壽枋慶王載堡懷慶王載塔成平王翊鑾龍陽王定燿南漳王定燁祈陽王厚燮南康王新燿永和王克炆進賢王廷煨河內王勁紱臨湍王安詩臨汝王睦楨上洛王勤燭



汾西王

巳巳禱雪

癸酉果雪群臣表賀

庚午李璣服闋補左中允兼脩撰

癸未前南京太僕寺卿王夢弼為右僉都御史巡撫寧夏


甲戌山西民兵戍京者三千人遣還鎮

丁丑錦衣衛帶俸指揮僉事趙汝成乞脩居第以千戶時給

價例不再著為令

上海縣地震生白毛高橋鎮民家雞作人言曰燒香望和尚

一事兩勾當明年倭禱羊山登岸劫殺



國權

嘉靖三十二年癸丑

正月戊寅朔日食適陰雲少頃大雪明日表賀

揀選京營兵豐城侯李熙論京營四事其班軍折糧不允

刑部左侍郎吳鵬賑徐邳等流民 上命發粟麥四萬石鹽

價五萬金

疏黃河下流增築高家堰長隄及新庄等閘


庚辰逮禮科都給事中楊思忠杖之百削籍餘給事中各奪

國權

嘉靖三十二年

一

國家圖書館, NATIONAL CENTRAL LIBRARY, TAIWAN, R.O.C.



月俸以先議孝烈皇后不當祔廟上惡之至是正旦賀表

首署名摘其句玄禧申錫詰責之傳

丁亥山東按察副使趙時春為右僉都御史提督鴈門三關

兼巡撫山西

己丑漕艘阻于新安口戶部行各省量減漕糧三之一

庚寅吏部大計降斥有差

壬辰嚴嵩等請及春婚二王從之擇二月嵩又言府第淺狹

在親王則可今日事體不同俱婚禁中便上謂其搖于外

議命舉冊立事嵩言此舉寔天下臣民所久望今迫婚期其

冊立候行之上答曰出府不可害及二王害及朕卿等明

言對曰儲貳名分未正而又外居雖應得者亦有危疑府第

連隔一垣從者衆情各為主易生嫌疑在二王蓋不可不慮

先朝上有太后有中宮東宮體勢增重主上尊安今列


后不在至親惟在二王乃俱外之在聖躬不可不慮上

謂皆不足恤人無能勝天者二子依分毋再瀆

癸巳月夜食

丙申脩復延安慶陽城堡斥堠

丁酉巡撫雲南鮑尚賢集兵共七萬討沅江叛酋那鑑那鑑




寔極自殺諭降其黨戕秩官者伏誅宥鑑字怒立那從仁暫
統其衆

已亥禮部上二王婚儀注言會典戒詞有二其曰往迎尔相
承我宗事為承宗者也曰往迎尔相用承厥家為承家者也
今留京所以承宗封國所以承家戒命之詞伏俟裁定廟見
古以三月後日以三日蓋先告祖考而親迎合卺成其為妻
明日夫率以見舅姑又明日盥饋成其為婦又明日率以見
祖考先後之序如此朝率與合卺同日成化中東宮納妃累
始改從古宜以改定者為正朝見盥饋先朝有太皇太后有

皇太后有中宮儀文各異今二王率妃詣上前行禮又各母
妃行禮以章順婦會典東宮不回門親王回門然未有定期
今宜待之國前一月擇日行餘如舊 上覽之不悅曰既云
王則遵制何不同之有第速降勅冊立太子分別成婚任尔
等為之勿以煩朕于是禮部遂擇日具儀以請 上問嚴嵩
對所司豈敢不尊前奉聖諭俟明命處分 上乃詔部臣曰
其遵朕初諭


庚子兵部武選員外郎楊繼盛劾大學士嚴嵩無丞相之名
有丞相之權各官陞遷未及謝恩而先謝嵩壞祖宗之成法



一罪也嵩票本竊威福 皇上用一人曰我薦之宥一人曰
我救之及罰一人曰此得罪于我故報之竊 皇上之大權
二罪也 皇上行政之善令于世蕃傳曰 上無此意我議
而成之刊嘉靖疏議欲天下後世善盡已出掩 皇上之治
功三罪也嵩票本于世蕃及諸義子趙文華等群會机密漏
泄縱奸子之僭竊四罪也長孫嚴効忠冒兩廣功陞所鎮撫
又冒瓊州斬七級功次孫嚴鵠加錦衣衛千戶効忠鵠皆
世蕃養子冒朝廷之軍功五罪也受仇鸞三千金逼兵部
薦大將及鸞勢出嵩上姑設異同氓其跡引背逆之奸臣六

罪今丁汝夔不戰汝夔臨刑始知見詔悞國家之軍機七也


罪也刑部郎中徐學詩劾嵩削籍考京察斥學詩兄中書舍
人徐應豐荷聖明留用戶科都給汝進事中厲汝進劾嵩降
典史外察罷斥專黜陟之大柄八罪也文武官陞遷不論賢
否惟視賄多寡將官有司既納賄不得利軍虐民失天下
之人心九罪也諂諛欺君貪污率下通賄慝勲者貪如盜跖
而亦薦疎訕者廉如夷齊而亦斥守法度者為固滯巧彌縫
者為有才勵廉介者為矯激善奔走者為練事壞天下之風
俗十罪也嵩大罪十 皇上若不知者何哉先用重賄結



皇上之左右其奸一義子趙文華為通政使凡副本送嵩世
蕃先閱後進疏少有干涉即為彌縫其奸二畏廠衛緝訪籠
絡結姻其奸三考選科道非通賄不與列又擇熟軟負融者
補科道無所建白即陞京堂方面其奸四令世蕃羅部署屬
有才望者凡事先報得預布置各官少異議早為斥逐其奸
五嵩之罪賴此奸彌縫之奸一破則罪立見矣望 皇上察
嵩之奸群臣畏威固不必問或召問二王令其面陳嵩惡賊
嵩去胡虜不足平也 上怒摘引二王果何謂下鎮撫司坐
詐傳親王令旨律論死杖之百

設遷曰後先論嚴氏者雖多謹直其盡狀破的無過忠愍
矣末引二王為詞彼少長宮禁詎能悉嚴氏哉草奏時胸
臆衝涌筆不停思而法吏阿邑深文鍛入誠寧負 陛下
不敢忤權臣也

辛丑增淮鹽三分之一初中鹽正引一餘引二各二百八十
五斤正鹽開邊南京給引餘鹽輸金運司給票定淮南五錢
三分淮北五錢歲課共百十萬餘金至是定引鹽五百五十
斤淮南七錢淮北五錢商販不復赴邊坐夫飛輓鹽法益壅
湖廣軍器一年繕造二年徵金



癸卯協理京營戎政兵部左侍郎聶豹為尚書整飭薊州兵
備副使劉燾終制前奪情起家
乙巳命吏部左侍郎程文德知貢舉時禮部左侍郎孫陞遣
祀承天右侍郎閔如霖治二王婚禮
提督湖廣川貴兵部右侍郎張岳字惟喬惠安人正德丁
丁丑進士授行人諫南巡廷杖改南監學正 上即位復行
人歷禮部郎中廣東提學僉事請廣東提舉知廣州歷撫鄖
陽江西兩廣屢破賊巢改令官平銅仁叛苗復右都御史贈
太子少保謚襄惠

二月癸丑巡撫山西兵部右侍郎許論協理京營戎政

甲寅少保大學士徐階侍講學士教銑主禮闈

乙卯裕王醮戒文華殿親迎妃李氏出就邸

丙辰編修徐瞿景淳為侍讀

丁巳羅田縣省祭陳縉進白兔

戊午景王醮戒文華殿親迎妃王氏出就邸

巡撫湖廣屠大山為兵部右侍郎兼右僉都御史提督湖廣


貴州四川軍務山東按察副使趙時春為右僉都御史巡撫

山東

國權

嘉靖三十二年

六



太子少保禮部尚書署詹事府孫承恩致仕承恩京師與徐階同巷階多交游承恩惟閉門深臥嘗布袍負暄讀書僕私語他家如市我第中鬼寂也承恩曰任尔輩他往我獨在此聽鬼負去

壬戌命工部右侍郎陸杰作太和山玄像立坊曰治世玄岳癸亥奉先聖先師神位于文華殿左室向祀文華殿十六年移永明殿後

三月丁丑朔陝西大飢賑之

戊寅倭三十六人登青村所焦墩百戶王河禦之鋒未交即

潰河被殺寇銳甚莫敢拒月餘往金山衛至乍浦過浙兵擒剿之

辛巳山東布政司右叅政王輪為右僉都御史駐守昌平


虜犯延綏副總兵李海敗沒

壬午吏部右侍郎程文德署詹事府兵部右侍郎楊博兼右僉都御史巡邊

甲申山東飢賑之

南京兵部尚書屠楷致仕

後府平江伯陳圭總督京營戎政



乙酉倭二百餘人自金山犯海鹽去之

丁亥靈寶縣礦盜伏誅

巡按貴州趙錦上言正旦日食陰盛陽微之象嚴嵩以奸佞之雄怙恩寵以張其威權假刑賞以行其愛憎百官懾息諸司望風 陛下乾綱獨運自以為予奪悉由于宸斷題覆則在于諸司閣臣雖參謀議不過票擬取裁不知諸司則先受風旨矣群臣敢怒而不敢言 陛下何由而知之嵩引植私人布列要地以探諸臣之動靜先發制之故少暴露厚賂左右 陛下起居意向無不先得故多稱旨或俟聖意所發以

成其私或因事機所會以肆其毒幸而洞察于聖明則諸司代嵩受其罰不幸而遂傳于後世則 陛下代嵩以受其咎上以欺謗逮下鎮撫司杖四十削籍


己丑周府瑞淦王勤煥薨

辛卯策貢士曹大章等四百五人賜陳謹等進士出身有差

壬辰成國公朱希忠署後府

癸巳賜故大學士楊士奇祠春秋致祭

壬寅禮部左侍郎孫陞改吏部左侍郎兵部右侍郎楊博為兵部左侍郎巡撫陝西賈應春為兵部右侍郎



癸卯吏部尚書萬鍾滿秩加太子少保鍾才庸更通賄雖嚴
嵩引之心輕焉故加銜徑非故事也
甲辰虜數萬犯宣府入青邊口游擊孫邦丁碧戰卻之已尋
入深井堡殺副總兵郭都督千戶王國血戰士卒世半不為
懾力盡死之遂犯大同都遠人


丙午兵科給事中朱伯辰請築京師外城從之命戎政平江
伯陳奎侍郎許論錦衣右都督陸炳相度

閏三月己酉兵部尚書總督陝西軍務王以濟卒字士招江南
江寧人正德辛未進士令上高拜御史歷兵侍右侍郎總鎮
六載安靜不擾繕障塞布誠信俘斬虜千計及卒邊人罷市
贈少保謚襄敏塞定邊瓦楂梁二十餘里收屬番三千四百
五十四人置之嘉峪關外性寬博有遠識敏信而慎毋論居
官其居鄉亦推長者

壬子吏部請主事等官改選科道以啟藐不許

癸丑禮部右侍郎閔如霖為左侍郎太常寺卿吳山為禮部
右侍郎河南左布政使謝九儀為右副都御史巡撫陝西

丁巳兵部右侍郎賈應春兼都御史總督陝西三邊軍務
前福建巡海副使柯喬坐擅斬海盜削籍



辛酉戒諭韓王融燧奪將軍旭柵等爵幽鳳陽初諸宗室訐
韓王招集亡命圖不軌王亦摘諸宗室兇淫不法
摠理河道右副都御史曾鈞言黃河為患議者謂海口沙淤
所致臣按視販舟往來無滯傳聞不足信明甚且黃河西來
百餘里滙合百川古疏九河以殺猶莫支今各派出徐州抵
清河合淮趨海勢壯于無所分流故愈益衝潰為徐邳桃遷
頻年之患更宜多穿支河于開封等上流令隨便灌入分殺
水怒庶可為永利下撫按議之
甲子衛府新樂王厚嫌薨

乙丑大道殿成

作京師外城

提督戎政陳圭錦衣衛少保左都督陸炳戎政侍郎許論工
部左侍郎陶尚德內官監右少監郭暉提督工程錦衣衛指
都揮僉事劉鯨都指揮使朱希孝監之

巡撫江西翁溥為兵部右侍郎

侍講學士敖銑為太常寺卿署祭酒


辛未寧夏地震

壬申羅源縣地震如雷

國權

嘉靖三十二年

十



甲戌海盜王直糾倭連舟百餘犯浙江沿海郡縣蕭顯自浙
登松江寶山縣恣掠

乙亥海盜陷昌國衛五日叅將俞大猷攻走之尹鳳以閩兵
邀于北茭洋擊斬八百餘級

四月丙子朔久旱 上禱雨內殿

倭二百餘人焚海鹽南門知縣鄭茂力拒之五日乃解

丁丑裁巡鹽屯牧營田及駐守昌平都御史

戊寅增古北口叅將

己卯江西左布政使蔡雲程為右副都御史巡撫江西

左春坊左庶子郭朴兼侍講署院


壬午山東江北饑盜平

癸未寧夏地震如雷

乙酉杭州衛指揮陳善道吳懋宣擊倭于赭山敗死又陷昌
國衛殺百戶陳表觀海衛指揮張羅追之崎頭洋斬五十級
叅將俞大猷搗倭巢于烈港不利倭亦尋遁

丙戌浙江舟師破盜于松門港

戊子五軍營副將署都督僉事劉大章為提兵官鎮守宣府
倭攻江南太倉不克有失舟倭四十人突至平湖乍浦所掠



海鹽海鹽敗官兵殺把總馬呈圖指揮采煉滿朝踰旬遁

庚寅太白晝見

壬辰王正國殷正茂謝江為給事中李邦珍李一經曹光李
守仁詹理何廷鈺為試御史

癸巳倭破上海縣初松江通判劉本學以五百人戰十九保
連賓華橋大敗之死傷甚眾上海知縣俞顯卿遁掠于市去
而後至

甲午宮人王氏薨謚莊昭

丁酉倭破吳淞南匯所城分掠江陰

南京吏部尚書潘潢改南京兵部尚書

己亥作宜春宮


魯府樂陵王健繫薨

庚子倭掠江南海州時乘風揚帆倏忽千里莫測其向

辛丑前兵部尚書太子少保史道卒直隸涿州人正德甲戌
進士

壬寅倭破臨山衛乘勝西犯松陽知縣羅拱辰督民兵禦之
賊浮海走叅將俞大猷邀擊斬六十九級

甘州左副總兵姜應熊為總兵官鎮守寧夏



甲辰倭破福寧之泰嶼所

松江倭出海

五月丁未唐吉士萬浩姚弘謨李貴呂旻郭敬賢梁夢龍王希烈南軒姜寶王學顏趙祖鵬顧汝嘉馮葉孫應鰲孫鋌徐師曾張四維方萬有蔣煇李蓑張九功吳可行陸泰馬自強張巽言王文炳晁東吳王詠等吏部左侍郎兼翰林學士程文德教習

巳酉倭圍海鹽不克

壬子松江兵值倭高昌渡失利未几倭千餘從太平寺入市

市人潰大掠趨焚漕艘


癸丑倭復破上海

甲辰又倭百餘人掠海鹽海寧

丙辰提督倉場戶部左侍郎孫檉疾去

丁巳倭復約海口周浦兩道寇松江鎮海衛指揮武尚文建平縣丞宋鰲調至戰敗死邑里為墟

庚申提督宣大侍郎蘇祐言先年擺邊非策守鎮兵不過七八萬邊千餘里分七八十人豈足守禦虜聚而多我分而寡勢不自支虜既入邊我兵反後故守邊不若守堡分地駐



防亦制虜一策兵部以成業惜其舉而棄之宜量撥軍夜巡
瞭從之

壬戌倭陷乍浦所知縣羅拱辰來援倭流劫奉化寧海參將
湯克寬追敗之獨山賊半藝死餘遁入海

王起用賓楊行中吏部左侍郎行中總督倉場理西苑農事
虜五百餘騎犯遼東上榆林堡副總岳兵懋禦卻之追至小
長山斬四十七級

癸亥增金山叅將

庚午復江淮副總兵提督海防移福興漳泉叅將湯克寬為


之駐金山衛

壬申倭復至上海鎮撫吳賢戰于上海之黃泥浜自後浦東
沿海二百里新舊倭無虛日延及蘇州太倉吳淞千戶所金
山衛

辛未夜倭復破上海

六月辛巳定王府庶人口糧歲七十石妻子預馬擅婚者五十
石傳生者二十五石

虜犯宣府西路新開口叅將史祿死之贈右府左都督廕
指揮僉事時虜氛甚熾朵顏諸夷挾之索賞邏卒出塞輒縛



之取贖諸將偷旦夕幸贖軍資以賄之巡按御史蔡揚金白
其狀

壬午總督漕運兼巡撫鳳陽連鑛匿飢盜不以聞調外

七月乙巳朔右僉都御史倪嵩為左副都御史

虜倣京師九門列營戶部左侍郎馬坤治餉時陳分屯昌平
順義懷柔陳圭屯郭門徵山西老營堡游擊劉承惠赴良鄉
戊申晉府奉國將軍表觀越閩廢為庶人詔嚴其禁先奪爵
而勘之

丁巳大理寺卿盧勳為刑部右侍郎大理寺左少卿馮南京

天馭為右僉都御史


南贛巡撫張烜提督操江都御史蔡克廉各被劾免

虜俺荅把都兒等大同自弘賜堡犯渾源下靈邱廣昌

庚申宮人褚氏薨追封晏妃

虜入紫荆關浮圖峪突犯山西總兵李洙等屯廣昌戰于永
安堡相持數日大同總兵吳漢軍黃土溝宣大總兵劉大章
軍黑石嶺各觀望不進洙遂敗績虜徧掠蔚應渾源靈邱至
磁窑口為伏砲所中

癸亥旌魯王頤坦賢孝王事端王病當藥請代喪葬遵禮捐



田湖以賑貧民

甲子撫治鄖陽右僉都御史沈良才為大理寺卿廣東左布政使談愷為右副都御史巡撫南贛汀漳河南右布政使史褒善為南京右副都御史提督操江


改王忬提督軍務兼巡撫浙江并福興漳泉其應天鳳陽山東遼東巡撫都御史兼理海防松陽知縣羅拱辰六合知縣董邦政各添注浙江按察僉事俱率民兵禦倭

戊辰作大通橋門彰義門城樓
金星晝見四日沒

庚午柘城盜師尚詔陷歸德尚詔本販鹽行劫巡撫謝存儒誤委為伯長聽訟自恣守臣欲誅之遂反攻入郡殺檢校董倫屠掠甚眾戒勿犯學舍子弟故官吏匿免而柘城少年乘尚詔出掠淫其家遂攻柘城磔少年還攻鹿邑太康儀賓沁水韓魏寓太康率眾扼賊四日死之

辛未固原游擊陳鳳寧夏游擊朱玉來援過浮屠峪夾擊之虜馳去鳳王急進守者具葶犒鳳王曰毋緩虜吾旋軍享之追虜三家村大戰竟日殺傷過當

壬申虜欲北慮鳳王躡之以騎綴我分眾出廣昌石門峪等



塞 上聞之大悅立進都督僉事賜金四十文綺二

八月乙亥朔虜東犯蔚州自平刑關入掠代州繁峙八日始出塞 增浙西兵備副使叅將

丙子存問靈邱王聰滿年八十

河南都指揮尚允指揮李塘等率兵援太康戰于鄆陵敗績 戊戌免山東濟南東昌青兗災租仍賑之


江西平樂縣徭賊平

辛丑河南兵擊賊于霍山賊圍之副使曹邦輔身督戰遂破賊斬四百餘級賊走太康勢復振

壬寅蘇州府同知任環禦倭功進整飭蘇松兵備山東按察僉事環率民兵躬出戰徧其身書姓名曰死綏職也遺體不可棄識者為收為其骨屢戰有功

癸卯勅旌晉府西河王奇溯長子表相孝行侍疾彌月不解帶有雨鶴之祥初奇溯三歲而孤母病渴祝天甘泉湧渴愈父子俱以孝聞

九月丙午虜萬餘騎入大同平虜衛犯山西利民等堡山西巡撫趙時春禦之至廣武諸將皆會時掠八角堡謀僅二十騎去此兩舍可掩也時春擐甲前搃兵李洙爭不聽至虫嶺中



伏洙與子松及大同叅將馮恩游擊李桂神池守備孔賓備
頭守備高遷太原指揮陳金中軍把總尹忠皆戰死軍殲焉
時春走土墩哨卒繼上之乃免虜尋遁贈洙少保
辛酉叙功進宣大總督蘇祐兵部尚書廕錦衣千戶總兵劉
大章都督同知巡撫艾希淳 右副都御史兵部尚書聶
豹太子少保廕錦衣千戶餘陞賞有差
壬戌禮部左侍郎閔如霖兼學士同教習展吉士
癸亥河南官兵連賊于蒙城商邱師尚詔勢迫易服遁
賊起踰四旬破城八屠僇十萬餘人中原震動

甲子免鳳廬淮揚田租

增直隸通泰叅將

乙丑薊永總兵官韓承慶為都督僉事總兵官移鎮山西

辛未禮部右侍郎吳山為左侍郎左春坊左庶子兼侍讀學
士郭朴為禮部左侍郎


倭百餘人掠華亭掠金山衛先是六月倭東遁江南稍寧崇
明南沙有流倭三百人舟壞不能總兵官湯克寬兵備僉
事任環列兵守之久不克又告警

十月甲戌朔盜警分賑河南粟三萬石山東四萬石

國權

嘉靖三十二年

大



乙亥忻州定襄地震

吏部左侍郎程文德請賑荒河東山東徐邳淮揚課有司冊
記報可

丙子立柳將軍廟于新安鎮將軍名匡山東人宋時陣沒嘗
見神于河道搃河曾鈞以聞

丁丑山西榆次交城地震

右春坊右諭德兼侍讀學士 署院

已卯搃兵官湯克湯寬以徐邳等州官兵擊南沙倭失利亡
卒四百餘人

免北京宣府遼東紹興寧波台州災租其海鹽平湖准折免
仍賑之

辛巳南京太常寺卿鄭曉為刑部右侍郎

戊子湯克寬擊倭于寶山追敗之斬七十三級俘十四人


庚寅前搃督漕運右副都御史連鑛卒

巡撫延綏張珩為南京兵部右侍郎

壬辰宣府叅將張堅為署都督僉事搃兵官鎮守大同

倭三百餘人突犯上海太倉至常熟知縣王鈇禦卻之

癸巳建安王宸瀟薨



乙未左春坊左中允李璣為左諭德脩撰郭鑿為洗馬
定武舉三登鄉科徑會試
丙申行人侯東萊賈賞諭南直隸山東撫按等官破格賑飢
刊示百姓

河南山東中都班軍仍命春秋入衛自二十九年虜患併班
俱四月初入衛十月初還


丁酉南京兵部尚書潘潢劾免逮前河南巡撫謝存儒至今
南京戶部尚書張經改南京兵部尚書起王翰右僉都御史
巡撫延綏

戊戌 上憂民乏食問嚴嵩請發太倉粟數萬石平糶其山
東河南發臨清德州粟之賑上又問暴殄嵩請巡城御史撫
按各督有司掩埋仍賑京民二萬石煮粥命亟行之

己亥諭戶部計處錢法嘉靖錢七百准一金舊錢倍之

禮科給事中王正國往按延綏功罪初搃督侍郎賈應春報
斬虜二百八十五級巡按御史吉澄言米脂綏德延川延安
甘泉洛川鄜州中部宜君共殺一千七百六十餘人掠一千
九百七十五人以捷畝互異故遣正國

庚子獲師尚詔于莘縣巡撫河南楊宜賜金幣



辛丑京師外城成

壬寅流倭登興化南日舊寨流劫殺千戶王巨卿把摠指揮
張棟以舟師擊之走獨山知府董士弘圍而殲之時倭警真
夷十三我奸民十七

十一月癸卯南京右都御史周延為南京吏部尚書

甲辰湖廣龍潭安撫司土夷黃俊黃中等作亂據雲萬奉節
大殺掠

乙巳倭復犯上海至嘉定

丁未命守備張啟元暫住田州田州土官岑芝卒子大壽四

歲偽孽莫韋冒岑氏及土官岑施相構亂

戊申南京工部尚書孫應奎改南京戶部尚書

甲寅 上作重脩太岳太和山玄殿記

乙卯靖江王宗室經茜潛至南京命廣西立間錮罪宗


城平湖蕭山奉化福清惠安

丙辰總理糧儲巡撫應天兵部右侍郎彭黻為南工部尚書

丁巳出內府錢折文武官俸及軍餉

辛未吏部尚書李默入朝

十二月癸酉朔輔臣請立 皇太子不允



甲戌運倉粟十萬石于宣大十二萬石于昌平

增紫荊倒馬居庸諸關隘隆慶諸衛卒月餉銀二銀

丙子玄岳太和山成頒賞諸臣

庚辰刑部右侍郎鄭曉改兵部右侍郎兼右僉都御史總督

漕運兼巡撫鳳陽

右春坊右諭德兼侍讀尹臺為南京祭酒

定禮親王孟夏冊封禮部以歲終當遣使而畿甸災傷駢遞

艱阻請移來年四月應古孟夏封諸侯之禮著為令

甲申蠲蘇松常鎮漕賦及改派蠲停各項

丙戌會議各邊總督鎮巡優劣罷薊遼總督何棟降宣府巡

撫劉壘免山西巡撫趙時春

戊子雪群臣表賀

琉球入貢


庚寅南京戶部右侍郎陳儒改刑部右侍郎兵部左侍郎楊

博兼右副都御史巡撫山西河南布政司右叅政劉廷臣為

右僉都御史巡撫宣府


宣府叅將歐陽安為署都署僉事總兵官鎮守保定


丙申江西左布政使陳洙為右副都御史總理糧儲兼巡撫




應天
已未編脩嚴訥為侍讀
漕河成摠理河道右副都御史曾鈞為工部右侍郎兼右副
都御史


國家圖書館, NATIONAL CENTRAL LIBRARY, TAIWAN, R.O.C.







國家圖書館, NATIONAL CENTRAL LIBRARY, TAIWAN, R.O.C.







國家圖書館, NATIONAL CENTRAL LIBRARY, TAIWAN, R.O.C.






國家圖書館, NATIONAL CENTRAL LIBRARY, TAIWAN, R.O.C.








國家圖書館, NATIONAL CENTRAL LIBRARY, TAIWAN, R.O.C.





國家圖書館, NATIONAL CENTRAL LIBRARY, TAIWAN, R.O.C.





國家圖書館, NATIONAL CENTRAL LIBRARY, TAIWAN, R.O.C.

